

**OPICI PA DUL ME WII-LOBO PI KUBO
KIN LOK MA MAKO ILO RWOM ME
KWO KI JWIKO CAN PA DANO. (United
Nations Office For The Co-ordination of
Humanitarian Affairs - OCHA)**

Gin ma Dul man ocoyo

**NGEC ME NIANG CIK I KOM RINGO
AYELA. (WEKO KABEDO ME KWO ME
KARE DUCU CI KOBO I KABEDO
MUKENE MA TYE I LOBO ACELLI.)**

***Coc macek i acakki me ngec me niang cik man:
Lacoyone Lalub kor karan madit pi lok ma mako ilo
rwom me kwo ki jwiko can pa dano: Ladit Sergio Vieira
de Mello***

Ngec pa dul dano ma gineno kit me ilo rwom me kwo ki jwiko can pa dano tye ka medde-amede i kom peko marac me ringo ayela; (weko kabedo (paco) me kwo me kare ducu ci kobo i kabedo mukene ma tye i lobo acelli;) ma wel dano ma peko man makogi i wii loboni kulu romo milyon 20 (pyer-aryo). Ma tic me gwoko loring ayela, (joo ma guweko kabedo-gi me kwo me kare ducu ci gukobo i kabedo mukene ma tye i lobo acelli) ocung me acel, atikane i cing gamente (madito) ki wegi twero me kabedo; pire tek pi dul dano me wii-lobo me neno kit ma loyo maber ma gitwero miyo ki kony pi medo rwom me gwok i kom joo ma guringo ayela (guweko kabedo-gi me kwo me kare ducu ci gukobo kabedo ka mukene ma tye i lobo acelli) i kare me adaga-daga (kwere matek) i kin dano ki peko marac. Wan myero bene wayub kony me ilo rwom me kwo ki jwiko can pa dano i yoo mo ma twero medo gwoko rwom pa loring ayela (joo ma guweko kabedo me kwo-gi me kare ducu ci gukobo i kabedo mukene ma tye i lobo acelli).

Ki ii kit ma Dul Lobo Muribbe kacel tiyo kwede, (United Nations System) yoo ma nen kamaleng dok pire tek dong gityeko kwanyo me medo pi tic mupore dok i cawa matir pi miti pa loring ayela. (joo ma guweko kabedo me kwogi me kare ducu ci gukobo i kabedo mukene i lobo acelli). Dul/Komiti ma kubo kin nyo tiyo i kin Dul mapat-pat (The Inter-agency Standing Committee-IASC) otyeko miya twero me tic calo wir i kin Dul Lobo Muribbe Ka'cel (UN) pi lok ma dok i kom loring ayela. (joo ma guweko kabedo me kwogi me kare ducu ci gikobo gibedo ka mukene ma tye i lobo acelli.) I keto i tic twero man ma gimiyo, amiine me medo kero pa Dul Lobo me tic, pi timo gin mo cut i kare me kit peko mo keken me ringo ayela ka'cel ki medo kubo kin tic matek pi poko kin tic ma nen kamaleng pi dul mapat-pat ki cwak muromo bot lotic ma gucung pi dul mapat-pat.

Ma lubbe ki lok man, ajolo ngec me niang cik i kom Ringo Ayela ma Lacungu ka wang karan madit pi loring ayela aye ocwalo woko. Cik magi, ma gujenge i kom cik me wii-lobo pi ilo rwom me kwo ki jwiko can pa dano kacel ki lok aluba pi twero pa dano; myero gutii calo gin ma kwako lobo ducu pi telo gamente ka'cel ki lotic me wii-lobo pi ilo rwom me kwo ki jwiko can pa dano ki lotic me dongo lobo i miyo kony ki gwok bot loring ayela.

Dul/komiti ma kubo kin nyo tiyo i kin dul mapat-pat cwako totwal ngec me niang cik man dok otyeko cuko cwiny lomemba-ne me poko-gi ki lodito tic-gi (Executive Boards) ki lotic-gi totwalle magi ma gitye ka tic woko i kin dano, me neno ni cik magi giketo-gi i tic i gin ma gitimo pi loring ayela.

Ayee ni ngec me niang cik magi twero timo tic ma pire tek i medo ngec i kom miti pa loring ayela, nongo cwak ki i kin dul dano ma ilo rwom me kwo ki jwiko can pa dano ki konyo lowotgi ma gitye ka tic woko i kin dano me nongo yoo me cobo peko ka gukemme ki gwok wa kony ma mitte pi loring ayela. Cik magi bikonyo bene gamente i kelo kuc ki gwok maber pi lwakgi muringo ayela.

Ageno ni ngat acel acel bitiyoyo me neno ni ngec me niang cik magi gipoko nyo giyaro dok giketo i tic i kabedo malac kit matwere, pi kelo aloka-loka maber ma mitte totwal i rwom ki tic i kom loring ayela.

Coc macek me miyo ngec

Lacoyone obedo Lawang Karan madit pi Loring Ayela. (joo ma guweko kabedogi me kwo me kare ducu ci gukobo i kabedo mukene i lobo acelli.) Ladit Francis M.Deng.

Dul dano me wii-lobo okemme ki twon tic pi neno ni gwok tye pi dano ma gikwanyo-gi tek-tek ki i pacogi ki adaga-daga me gero, turo twero pa dano i yoo marac ki tim mukene ma balo wii dano, ento ma nongo en i lobo-gi ni. Cok-cok jwii gin deno can malit me bedo labongo jami ma myero gubed kwede me kwo, peko ki apoka-poka. Pi cobo peko man aye oweko ngec me niang cik i kom ringo ayela giyubo.

Cik man nyuto kamaleng twero ki cikke ma rwatte ki gwoko loring ayela i rwom ducu me ringo ayela. Gin miyo gwok i kom dic ducu me weko kabedo me kwo kare ducu ci kobo i kabedo mukene i yoo ma pe opore, keto guti me konyo ki gwoko dano i kare me ringo ayela, ki keto yub maber pi dwoko dano cen i kabedo-gi, kony ma mitte pi cako te kwo manyen ki cako kwo kacel ki dano odoco. Kadi cik man pe obedo gin ma diyo dano ni myero gilubi, cik magi nyuto kamaleng dok lubbe ki cik me twero pa dano me wii-lobo kacel ki cik me ilo rwom me kwo ki jwiko can pa dano dok obedo calo cik ma mako ringo ayela.

Cik magi giyubogi mot-mot i nge mwaka mapol ma olubbe ki twero ma Dul/Kamicion pi twero pa Dano (Commission for Human Rights) ki lacen mok pa en Dul/Kamicion ki pa Kacokke Madit (General Assembly) gumiina i mwaka 1992. I acakki-ne, gipenya ni aniang tyen lok ma kelo ringo ayela ki adwoggi-ne, rwom me kwo nyo bedo pa loring ayela i te cik me wii-lobo, kit ma gitye ka tic i kom miti-gi i te yub mapol pa dul me kare-ni ki yoo mapol me medo gwok ki kony pi gin.

Ma lubbe ki meno, yubo cik ma mitte ki kit me kwo ma myero gijeng-nge iye pi loring ayela ki cako keto dano ma nyayo ngec me lok ki Gamente ki joo mukene me poro lok me kakagi nyo pi gin aye gubedo tic ma pirgi tek me twero

ma gimiya. I tic kacel ki dul mo pa ludiro me cik me wii-lobo, angiyo matut rwom ma dano ma ringo ayela ginongo kwede gwok ma oromo i te cik me wii-lobo ci acoyo "Buk ki Yoo me Kwo ma pol dano cwako ma lubbe ki cik ma gingiyo iye matut" (Compilation and Analysis of Legal Norms) E/CN.4/1996/52/Add.2).

Kwan ma gitimo onongo ni kun nongo cik ma tye okwako lok ma pirgi tek atika pi loring ayela, tye lok nyo kabedo mukene ma pirgi tek ma pe miyo tam muromo pi gwoko ki konyo loring ayela. Ma lubo meno, Dul/Komicon ki Kacokke Madit gupenya me yubo/coyo tam ma opore i kom kit yoo me kwo pi loring ayela. Man oweko gicoyo Ngec me Niang cik pi tutuno ma tito odoco kit me kwo ma gicwako ma tye dok temo me tito/gonyo kabedo ma pe niango dano ki dok pongo kabedo murem.

I nge miyo ngec me niang cik bot Dul/Komicon i mwaka 1998, Dul/Komicon ocaoko keto i tic lok mo ma gimoko ma cwako Ngec me Niang cik magi kaçel ki tamma ma atito calo lawang karan madit me tic kwedgi i medde ki yubba me lok ki Gamente mapat-pat ki joo ducu ma twero-gi ki tic-gi kwako nyo lubbe ki miti pa loring ayela. Dul/Komicon bene oneno mok pa Dul/Komiti ma kubo kin nyo tiyo i kin dul mapat-pat ma onongo ojolo cik magi dok gujingo cwiny lomemba-gi me poko-gi ki lodito ticgi ki lotic-gi, totwalle ka gitye ka tic woko i kin dano, ki me keto cik magi i tic i gin ma gitimo me kaka loring ayela.

Ngec me niang cik magi myero omii ngec ma tiyo ma tye ki kony nyo ber bot Gamente, wegi twero mukene ma gitye ki ngec muromo, dul mapat-pat ma i kin Gamente ki dul ma pe gijeng-nge i kom Gamente i tic-gi ki loring ayela. Genna tye ni cik man gibipoko-gi kabedo mapol malac dok gibiketo-gi i tic i yoo ma tiyo woko i kin dano.

NGEC ME NIANG CIK I KOM RINGO AYELA (WEKO KABEDO ME KWO ME KARE DUCU CI KOBO I KABEDO MUKENE MA TYE I LOBO ACELLI)

ACAKKINE-GIN MA TYE I BUK MAN KI GIN MUWEKO GICOYO

1. Ngec magi me Niang Cik loko i kom miti mogo pi loring ayela ma i wii-loboni kulu. Gin cimo kamaleng twero ki cikke ma rwatte pi gwoko joo ma gidiyo-gi tektek me weko kabedo-gi me kare ducu ki pi gwoko-gi ki konyogi i kare me ringo ayela ka'cel ki i kare ma gidok nyo ma gidwokogi i kabedo-gi me kare ducu ki me cako bedo i kin dano odoco.
2. Pi tyen lok me Cik magi loring ayela aye joo nyo dul dano ma gidiyo-gi adiya tek-tek nyo giwaco ni guaa woko nyo me weko paco-gi nyo kabedo-gi me kwo me kare ducu calo gang-gi, totwalle calo adwoggi me nyo me wene ki adwoggi me lweny ki luduku, kare me lweny, turu twero pa dano nyo peko ma poto pire kene nyo ma dano aye cako dok pe gungolo wang lobo ma ngene ma poko kin lobo mo.
3. Cik magi nyutu dok tiyo ma rwatte nyo rom ki cik me twero pa dano me wii-lobo ki cik me wii-lobo me ilo rwom me kwo ki jwiko can pa dano. Gin gimiyo ngec bot:
 - (a) Lawang Karan Madit pi loring ayela i timo ticce ma gimiye;
 - (b) Lobo ma ka gukemme ki gin ma nen calo ngwec me ringo ayela;
 - (c) Wegi twero ducu, dul ki dano i tic-gi ma mako lok kom joo muringo ayela; ki
 - (d) Dul ma i kin gamente ki dul ma pe jeng-nge i kom gamente ma nongo gitye ka lok i kom ringo ayela.
4. Ngec magi me niang cik myero gipok-gi dok giketgi i tic i kabedo mapol malac kit ma calo twere.

Dul me I. Cik Lumuku

Cik namba 1

1. Joo ma loring ayela gibibedo ki yomcwiny, mupong marom, twero marom ki bedo agonya i te cik me wii-lobo ki me lobo moni ni kit ma joo mukene gitye kwede i lobogi. Pe gibibedo ki apoka-poka i kom-gi i kit me nongo yomcwiny me kit twero mo keken ki bedo agonya pien gin loring ayela.
2. Cik magi pe gicwako bal ma ngat acel acel otimo i te cik me wii-lobo, totwalle ma lubbe ki neko dano lumuku nyo i dul, bal ma gengo ilo rwom me kwo pa dano ki jwiko can ki bal ma timme i kare me lweny nyo mony.

Cik namba 2

1. Cik magi wegi twero ducu, dul ki dano gibiworo labongo paro pi rwom-gi ma lubbe ki cik, dok gibilubu dok gibiketo i tic labongo apoka-poka mo ma pe rwatte nyo ma romo wano ngat mo. Woro nyo lubo cik magi pe bikwanyo twero nyo rwom me cik pa wegi twero, dul nyo joo ma lok man mako-gi.
2. Cik magi pe gibigonyo-gi calo gin jwiko twero, loko, nyo balo kit dul cik mo keken me wii-lobo pi twero pa dano nyo cik me wii-lobo me ilo rwom me kwo pa dano ki jwiko can nyo twero ma gimiyo ki dano i te cik me lobo moni ni. Totwalle, cik magi pe tye ki lageng mo pi twero me penyo wek inong nyo ibed ki ka gwokke ma gamente me lobo mukene miyo pi loring ayela i lobo gi.

Cik namba 3

1. Wegi twero me lobo gitye ki gin atima me acel ma pire tek dok ki tic me miyo gwok ki kony me ilo rwom me kwo ki jwiko can pa dano bot loring ayela ma gitye i te twero ma meg-gi.

2. Loring ayela gitye ki twero me penyo ki me nongo gwok ki kony me ilo rwom me kwo ki jwiko can-gi ki bot wegi twero magi. Gin pe gibilanyogi nyo gibitimo-gi marach nyo pwodo-gi pi penyo pi gwok ki kony ma calo meno.

Cik namba 4

1. Cik magi gibiketogi i tic labongo kit apoka-poka mo, ma calo me rok, kala nyo rangi, laco nyo dako, leb, dini nyo yee mo, lok loc lobo nyo tam mukene, lobo dul rok nyo kama iaa iye, rwom me te cik nyo me dito i kin dano, mwaka, goro, jammi, nywal, nyo i kom kit yoo mo keken, ma rom ki ma gicimogi kany.
2. Loring ayela mogo, ma calo lotino, totwalle joo matino labongo lugwokgi, mon muyac, megi lotino matino, mon ma gitye wegi gang, joo ma gitye ki goro ki joo ma gutii gibibedo ki twero me gwok ki kony ma mitte ma lubbe ki peko ma i kom-gi ki me nongo yat pi two ma lubbe ki miti gi ma pirgi tek.

Dul me II. Cik ma Lukke ki Gwok i Kom Ringo Ayella

Cik namba 5

Wegi twero ducu ki lotic me wii-lobo gibiworo dok gibineno ni giworo gin ma myero gitim i te cik me wii-lobo, ma i kine tye iye twero pa dano ki cik me ilo rwom me kwo ki jwiko can pa dano, i yoo ducu, wek ojuk dok ogeng kit gin mo keken ma gwok twero kelo ringo ayela pa dano.

Cik namba 6

1. Dano acel acel bibedo ki twero ni myero gigwoke ki i kom ringo nyo aa weko gang-nge nyo kabedo mere me kare ducu pi tyen lok ma en pe ngeyo dok pe atir nyo diye.
2. Gengo ringo ayela pi tyen lok ma pe giniang dok pe atir tye iye ringo ayela:

- (a) Ma ojeng-nge i kom yub me apoka-poka me rok nyo rangi, "jwayo rok mukene woko" nyo kit tim marom calo meno ma giyubo pi adwogi ne obedo loko kit ma rok nyo kaka, dini nyo rangi pa lwak moni ni onongo tye kwede;
- (b) I kare me lweny ki luduku, ni kwanyo ka gwoko kuc pa reya ma gitye nyo tyen lok ma lubbe ki tic me mony mito ni myero gitim;
- (c) Pi yub nyo tic me dongo lobo madongo ma pe tye ki tyen lok ma atir ma diyo ki tek dok kato nyo loyo miti pa lwak;
- (d) Pi peko nyo can, nikwanyo ka gwokke ki gin ma kelo can nyo peko ki yot kom pa joo ma gitye mito ni gikwany-gi woko; ki
- (e) Ka gitiyo kwede ma calo pwod i dul.

3. Ringo ayela pe bitero kare mabor kato kare ma mitte.

Cik namba 7

- 1. Ma pud kit moko tam mo ma mito ni myero dano oring ayela, wegi twero ma gutikke ki lok meno bineno ni yoo ducu ma twere mapat-pat gingiyo me gengo ringo ayela woko. Kama yoo mukene dong pe tye, gin ducu ma twere gibitimogi me jwiko ringo ayela ki gin ducu maracu ma aa ki i iye.
- 2. Wegi twero ma gitye ka tic i ringo ayela ma kumeno gibineno ni, i rwom ma tiyo maber kato, ni gimiyo ka butu maber ki joo ma loring ayela, ni kit ringo ayela ni enu ni gitimogi i yoo ma yengo dano ma pe kelo awano/peko, cam ma kelo yot kom, yotkom ki lengo, ki dok ni jo me i ot acel pe gipoko kin-gi.
- 3. Ka ringo ayela otimme i kare mapat ki i kare me mony nyo lweny ki peko me can ma bino atura, gibilubo cikke magi:
 - (a) Wegi twero me lobo bimoko tam matwero ma cik omiyo ma cimo gin ma atima;

- (b) Ki bitimo gin muromo me cikke ki joo ma myero guring ayela, me bedo ki ngec muromo pi tyen lok ki yoo ma myero gilub pi ringo ayela-gi ki, kama twere pi culo pi gin muballe ki kobo kabedogi kamukene;
- (c) Tam labongo dic nyo cwak dok ma tye ki ngec muromo, ma aa ki i cwiny gibipenyone ki bot joo ma myero guring ayela;
- (d) Wegi twero ma gutikke ki tic man gibitemo me tic ka'cel ki joo ma peko man omako, totwalle mon, i kare me yubo tam ki keto i tic yub me kobo-gi i kabedo mukene;
- (e) Yoo ma weko gilubo cik, kama mitte, wegi cik ma gingeyo tic-gi aye gibiketogi i tic;
- (f) Twero me nongo adwoggi ma mitte nyo mupore ma romo cango nyo jwiko peko magi, ma tye iye ngiyo odoco lok ma gimoko ma wegi twero ma lungol kop mupore aye timo gibiworogi.

Cik namba 8

Kwanyo dano ki i kabedogi me kwo me kare ducu pe gibitimone i yoo ma turo twero me kwo, woro, bedo agonya ki kuc pa joo ma peko man makogi.

Cik namba 9

Lobo gitye i te twero mo acel ma diyogi me gwokke i kom kwanyo woko dano ma dong onongo gitye con i kabedo moni ni kakama wel dano ne nok i kabedo, lopur, lukwat ki dul mukene ma gitye ki yoo ma pire tek ma gikwo kwede kenyo ki maa matek i kom ngom-gi/lobo-gi.

Dul me III. Cik ma Mako Gwok i kare me Ringo Ayela.

Cik namba 10

1. Dano acel acel tye ki twero ma pe kwany-nye me kwo ma cik bi gwoko. Pe tye ngat mo ma gibikwanyo kwone i yoo ma pe opore ma pe lubbe ki cik. Loring ayela ma pe gicito i lobo mukene gibigwokogi totwalle i kom:

- (a) Nek lumuku nyo i dul;
- (b) Neko dano;
- (c) Nek atura labongo tam matut nyo nek calo pwod ma tye i te cik ento atura labongo galle ki tam matut; ki
- (d) Diyo nyo weko dano rweny, ma tye iye, mak tek-tek nyo gwoko dano i buc ma gingeyo pire ento labongo adot nyo bal mo, buru nyo ma adwoggine too.

Bura ki piya me timo kit bal mo keken ma gititogi malo ni gigengo-gi woko.

2. Oto nyo cako mony nyo tim adaga-daga ki gero mukene i kom loring ayela ma pe gitye nyo ma dong pe gitye ka nyuto adaga-daga me gero, gigengo-gi i yoo ducu. Loring ayela gibigwokogi, totwalle, i kom:

- (a) Oto nyo cako mony atyer nyo ata labongo apokapoka nyo kit tim mukene me adaga-daga gero, ma tye iye yubo kabedo ma giye ni giot nyo gicak iye mony nyo lweny i kom reya;
- (b) Weko dano bedo ki kec calo yoo me lweny i kare me mony;
- (c) Tic kwedgi calo kwot pi cobo miti pa lumony me cako lweny nyo me jengogi calo kwot, pi cwako nyo galo yub me cobo lweny pa mony;
- (d) Oto nyo cako mony i kem nyo kabedo ma giketo iye loring ayela; ki
- (e) Tic ki len-main (bom) me neko dano.

Cik namba 11

1. Dano acel acel tye ki twero me woro ki me kom, me adam/wic ki ada/genne.

2. Loring ayela, kono bedo agonya gi gijwiko nyo pe, gibigwokogi, totwalle i kom:
 - (a) Mako mon tek-tek, keto ret madongo nyo liro komgi, tim alany, timo calo pe dano/tim lee-lee nyo mukene ma dwoko rwom pa dano piny, ma calo lok ma mako tim adaga-daga nyo gero i kom mon ki coo, dic me doko malaya tek-tek ki kit yoo mo keken me gero nyo anywar ma pe opore;
 - (b) Opii/Guci nyo kit tim mo keken me opii/guci me kom kare, calo cato dano nyo cato me anyoma, buto ki dako nyo laco i yoo ma pe opore pi cobo miti ni, nyo diyo lotino me tic tek-tek; ki
 - (c) Tim me adaga-daga nyo gero ma giketo me yaro nyo medo tim bwami ki gero ma kelo lworu i kin loring ayela ma i lobo moni.

Bura ki piya me timo kit bal mo keken ma gititogi malo ni gibigengo-gi.

Cik namba 12

1. Dano acel-acel tye ki twero me bedo agonya me kwo kit ma en mito dok bedo ki kuc calo dano. Pe tye ngat mo ma gibiweko gimako ata labongo tyene nyo gigwoko i buc labongo tero i kot ka dotone.
2. Wek twero man otii maber pi loring ayela, gin pe gibiketo-gi i buc nyo guro-gi i kem. Ka pi tyen lok mukene mapat ma pirgi tek mitte totwal ni myero gigurgi i kem nyo gigwok-gi/gicokgi kacel, myero pe oter kare mabor ma kato kare ma mitte.
3. Loring ayela gibigwoko-gi ki i kom mak ata me apoka-poka ki gwokogi i buc labongo tero-gi i kot ka dotogi calo adwoggi me ringo ayelagi.
4. I yoo mo keken, pe gibitero loring ayela calo mabuc pa lumone mo.

Cik namba 13

1. I kit kare mo keken, lotino ma guringo ayela pe gibicoyo nyo cwalogi i mony nyo yee ki gin me donyo i mony nyo ka lweny;
2. Loring ayela gibigwokogi ki i kom tim apoka-poka me coyogi i mony nyo i dul mo keken calo adwoggi me ringo ayelagi. Totwalle, kit tim gero, lee-lee nyo ma dwoko rwom pa dano piny ma diyo loring ayela me yee nyo pwodo joo ma pe giyee ni ki coo gi tek-tek gigengo-gi i yoo ducu nyo kare weng.

Cik namba 14

1. Laring ayela acel-acel tye ki twero me bedo agonya me wot ki me yero kabedone calo gang kit ma iye mito.
2. Atikane, loring ayela gitye ki twero me wot labongo lageng mo me donyo nyo me kato woko ki i kem nyo kabedo mo mukene ma gigurogi iye.

Cik namba 15

Loring ayela gitye ki:

- (a) Twero me yenyo kama pe gitwero wanogi iye i but lobo kaka mukene;
- (b) Twero me aa weko lobogi;
- (c) Twero me penyoo kabedo me gwoko kome i lobo mukene;
- (d) Twero me neno ni gigwokogi i kom dic tek-tek me dok cen nyo ketogi me bedo i kabedo mo keken kama kwo, gwokke ki can nyo peko mo, bedo agonya ki/nyo yotkom ma meggi pe twero genne.

Cik namba 16

1. Loring ayela ducu gitye ki twero me ngeyo gin matimme ki kwene ma wadigi ma gurweny gitye iye.

2. Wegi twero ma gutikke ki tic man gibitemo me niang gin ma otimme ki kwene ma loring ayela ma gigoyo ripot ni gurweny gitye iye, dok giribbe ki dul mukene me wii-lobo ma opore/rwatte ma gitye ka tic i peko nyo tic man. Gin gibimiyo ngec bot wat-gi macok ma tye i kom kit ma yenyo tyen lok tye ka wot kwede ki miyo bot gi ngec i kom kit adwoggi mo ma ginongo.
3. Wegi twero ma gutikke ki tic man gibitemo me koko ki ngiyo me poko kom dano muto ma odong, gengo yako kom dano muto ki i lyel nyo ngido nyo ngunu-gi woko, ki miyo kony me dwoko cen nyo kelo kom dano muto mudong bot watgi macok nyo yijo-gi ki woro mupore.
4. Kama giyiko iye (lyel pa) loring ayela myero gigwok dok giwor i kit yoo nyo i kare ducu. Loring ayela myero gubed ki twero me oo kama giyiko nyo i wii-lyel pa wadigi.

Cik namba 17

1. Dano acel-acel tye ki twero ni myero giwor kwo me otte nyo gang-nge ki joo ma i iye.
2. Wek twero man otii maber pi loring ayela, lumemba nyo jo-ot acel ma gimito bedo ki kwo kaçel gibiyee ni gutim.
3. Lu-ot nyo jo-ot mapat-pat ma ringo ayela opoko kin-gi woko myero giribgi oyot-oyot kit ma calo twere. Yoo ducu mupore gibikwanyo gi me neno ni giribo lu-ot ma calo meno pi oyot-oyot, totwalle ka lotino tye iye. Wegi twero ma ticgi aye me timo man gibimiyo kony i kom peny ducu ma lumemba me ot nyo jo-ot moni gupeny dok gibijingo cwiny-gi ki ribbe kaçel ki dul ma ilo rwom me kwo ki jwiko can pa dano ma gitye i tic me ribbo ka'cel jo-ot ma gupokke.
4. Lumemba nyo lu-ot ma guringo ayela ma twero-gi me bedo agonya gijwiko nyo ki keto-gi i kabedo ma calo mabuc nyo cokogi i kem gibibedo ki twero me kwo ka'cel.

Cik namba 18

1. Loring ayela ducu gitye ki twero me bedo ki rwom me kwo muromo nyo mupore.
2. Manok muloyo, labongo paro pi kit kare moni ni, dok labongo apoka-poka, wegi twero ma gitye ki ngec muromo gibimiyo ki loring ayela dok gibineno ni gikonyogi maber me nongo:
 - (a) Cam ma mitte ki pii me atwoma;
 - (b) Gedo mo me gwokke ki kot nyo lyeto, can nyo lweny ma romo poto ki odi buto;
 - (c) Bongi mupore; ki
 - (d) Yadi ma mitte me two ki yoo me kwanyo cilo ki gwoko yotkom pa dano.
3. Keru muromo myero giket me neno ni mon gubedo tye i yubo ki poko jami magi ma gimitte ma gimiyoy.

Cik namba 19

1. Loring ayela ducu ma gunongo ret ki ma kum-gi lit (lutwo) ka'cel ki lugoro gibinongo yat ki gwok ma mitte maromo i rwom nyo kit matwere dok labongo galle totwal, labongo neno kit apoka-poka nyo yere-ayera pi tyen lok mo keken mapat ki me miyo yat me two. Ka mitte, loring ayela gibinongo kare me nongo ngec i kom kit ma wic tiyo kwede ki kit me kwo i kin lwak/dano.
2. Myero gibed atera totwal me neno lok kom yot kom ma mitte pi mon, ma tye iye nongo lotic me yotkom ma mon me miyo gwok ki kony, ma calo gwok me yotkom me nywal nyo nyodo, ka'cel ki miyo tam mupore pi joo ma gibuyo-gi nyo gilanyo-gi i yoo me buto ki mon nyo coo ki kit anywar nyo tim alany mulene.
3. Myero bene gibed atera me gengo two ma kobbe ka gigudi kwede ki two ma nyaa nyo kobbe i yoo mapat-pat, ma tye iye two jonyo, i kin loring ayela.

Cik namba 20

1. Dano acel-acel tye ki twero ni myero giyee nyo giwor i kabedo ducu ni en dano i wang (te) cik.
2. Wek twero man otii maber pi loring ayela, wegi twero ma gitikke ki tic man gibimiyo bot loring ayela karatac/waraga ducu ma gicoyo iye ngec ma mitte pi bedo ki yomcwiny dok tic ki twerogi ma tye i te cik, ma calo waraga me wot ka ki kato wang lobo, karatac me nyutu ki poko dano acel-acel, karatac me nywal ki me nyom. Atikane, wegi twero gibimiyo kony me nongo karatac manyen nyo me leyo ka wang karatac murweny i kare me ringo ayela, labongo penyo nyo keto tyen lok mogo ma tere peke, calo me waco ni ngat moni ni odok cen i kabedo ma onongo en kwo iye kare ducu ka wek gimiye karatac meno nyo kit karatac mo ma mitte.
3. Mon ki coo gibibedo ki twero marom me nongo kit karatac magi ma gi mitte dok gibibedo ki twero ni kit karatac magi gimiyo ma gicoyo i nying-gi nyo i kome.

Cik namba 21

1. Ngatti mo pe gibikwanyo jamine nyo gengo me bedo ki jamine pi tyen lok ma tere peke.
2. Jami pa loring ayela ki gin ma gitye kwede i kit kare ducu gibigwokogi, atikane, ki i kom tim magi:
 - (a) Kwalo kwo nyo balo jami ki bwami;
 - (b) Oto nyo cako mony atyer nyo ma coko dano ata labongo apoka-poka nyo kit tim mukene me adagadaga ki gero;
 - (c) Tiyo ki loring ayela calo kwot me gengo lweny pa lumony nyo me cobo miti pa lumony me lweny;
 - (d) Tiyo ki loring ayela calo gin me culo kwor; ki
 - (e) Giko kwo pa loring ayela nyo tic kwedgi calo jami ma giloyo aloya calo yoo me pwodo-gi i dul.

3. Jami pa loring ayela ki gin ma gitye kwede ma guweko i ngee-gi myero gigwok-gi ki i kom balo ki poko, gwoko nyo tic kedgi i yoo ma pe lubo cik.

Cik namba 22

1. Loring ayela, kadi ma bedo i kem nyo pe, pe gibibedo ki apoka-poka i komgi calo adwog-gi me ringo ayela gi i kare me nongo yomcwiny me twero magi:
 - (a) Twero me bedo agonya me tam, bedo ki lewic pi bal mutimme, dini nyo yee, tam ma i cwako dok i waco ki lok ma i mito;
 - (b) Twero me yenyo labongo dic nyo geng kamo me nongo tic ki me bedo i tic ma kelo lim;
 - (c) Twero me ribbe/rwatte ki joo mukene labongo dic nyo geng ki me bedo marom i yub nyo jami ma mako lwak;
 - (d) Twero me bolo kwir ki me bedo i yub nyo jami pa gamente ki pa lwak, ma tye iye twero me nongo yoo ma mitte me tic ki twero man; ki
 - (e) Twero me lok i leb ma gin niang.

Cik namba 23

1. Dano acel-acel tye ki twero me pwony-nye;
2. Wek twero man otii maber pi loring ayela, wegi twero ma gutikke ki yub man gibineno ni kit joo ma calo man, atikane lotino ma loring ayela, gunongo pwony-nye, i rwom me puraimari ma pe guculu pire dok ma nongo gidiyo-gi iye i te cik. Pwony-nye myero owor lanyut me tekwarogi, leb ki dini.
3. Keru ducu myero giket me neno ni mon ki anyira gubedo tye muromo dok marom i yub me pwony-nye;
4. Pwony-nye ki jami me pwony-nye gibineno ni gubedo tye bot loring ayela pi oyot-oyot, atikane pi bulu ki mon, kono gitye ka kwo i kem nyo pe, tek twere.

Dul me IV. Cik ma Mako Kony me ilo Rwom me Kwo ki Jwiko Can pa Dano.

Cik namba 24

1. Kony ducu me ilo rwom me kwo ki jwiko can pa dano gibitimo-gi ma lukke ki cik me rwom me kwo pa dano ki bedo labongo leng-nge dok labongo apoka-poka.
2. Kony me ilo rwom me kwo ki jwiko can pa dano bot loring ayela pe gibipango wii-gi nyo tic kedgi i yoo mapat atikane pi tyen lok me loc lobo nyo me mony.

Cik namba 25

1. Tic me acel ma pire tek ki gin ma myero gitim me miyo kony me ilo rwom me kwo ki/jwiko can pa dano bot loring ayela tye bot wegi twero me lobo.
2. Dul me wii-lobo ma gitiyo me ilo rwom me kwo ki jwiko can pa dano ki lotic mukene ma rwatte ki tic man gitye ki twero me miine pi tic me konyo nyo cwako kor loring ayela. Kit kony nyo cwak ma calo meno pe gibiterone calo tim me mone nyo rwako um nyo donyo i lok me ot pa lobo moni ni dok gibiterone nyo gibinenone i cwiny maber nyo maleng. Yee nyo cwak ma gimiyo i kom lok meno pe gibijuko ata, totwalle ka wegi twero ma gitikke ki lok man pe gitwero nyo pe gimito miyo kony ma mitte me ilo rwom me kwo ki jwiko can pa dano.
3. Wegi twero ducu ma gutikke ki lok man gibimiyo twero dok gibimiyo ma kato ma pe tye ki lageng pi kony me ilo rwom me kwo ki jwiko can pa dano dok gibimiyo twero nyo yoo ki dano ma gitye ka tic me miyo kony ma calo man me oo bot loring ayela oyot dok labongo lageng mo.

Cik namba 26

Joo ma gitye ka tic me miyo kony me ilo rwom me kwo ki

jwiko can pa dano, yoo me wotgi ki jami ma myero gumii/gupoki gibiworogi dok gibigwokogi. Gin pe gibicako mony nyo lweny i kom gi nyo pi gin nyo tim mukene me adaga-daga ki gero.

Cik namba 27

1. Dul me wii-lobo ma gitiyo me ilo rwom me kwo ki jwiko can pa dano ki lotic mukene ma rwatte ki tic man, ka gitye ka miyo kony myero guket i tam-gi gwoko loring ayela ki twero ma meggi calo dano dok gukwany yoo mupore me timo gin maber i kom lok man. I timone kuman, dul ki lotic magi myero guwor rwom me wii-lobo ma rwatte ki cik ma mako kit ma myero gitim ki jami.
2. Dul lok ma malo ma man olubo koreni, tye labongo kit tam nyo gin mo marac i kom tic me gwok ma dul me wii-lobo myero gutim ma gimiyo igi twero me timone, ma ticce gitwero miine iye amiya nyo lobo aye twero lego-gi me timo.

Dul me V. Cik ma mako Dok Paco, Konyo me Cito ka kwo i But Lobo Mukene ki Ribbe me ka'cel Odoco i kin Dano

Cik namba 28

1. Wegi twero ma gingeyo tic-gi maber gitye ki tic ma pire tek ki gin ma atima me keto gin ma myero gitim me aluba, ka'cel ki miyo jami ma miyo twero ki loring ayela me dok paco ki cwiny-gi labongo dic, labongo wanne dok ki woro, i pacogi nyo kabedogi me kwo pi kare ducu, nyo konyogi me cito ki cwiny-gi ka kwo i but lobo mukene. Kit wegi twero magu gibitemo me miyo kony me ribo loring ayela ma gudok pacogi nyo ma gikonyo-gi me cito ka kwo i but lobo mukene.
2. Keru madit myero giket me neno ni loring ayela gubedo gin ki kom-gi i cawa ducu i yub ki loyo kit me dokgi paco, konyogi me cito ka kwo i but lobo mukene ki ribogi me kwo ka'cel odoco i kin dano.

Cik namba 29

1. Loring ayela ma gudok i pacogi nyo kabedogi me kwo me kare ducu nyo ma gikonyogi me cito ka kwo i but lobo mukene, pe gibibedo ki apoka-poka i komgi ma calo adwoggi me ringo ayela-gi. Gin gibibedo ki twero me bedo lirit nyo bedo tye dok i yoo marom i kit me tic alwak i rwom ducu dok gibibedo ki twero marom me nongo kony ma gimiyo ki lwak.
2. Wegi lobo ma gingeyo tic-gi gitye ki tic ki gin ma atima me konyo loring ayela ma gudok paco-gi ki/nyo ma gikonyogi me cito ka kwo i but lobo mukene, me nongo nyo dwoko cen, i rwom ma twere, jamigi ki gin ma gitye kwede ma guweko i ngee-gi nyo ma gikwanyo ki botgi i kare me ringo ayela-gi. Ka nongo kit jamigi ki gin ma gitye kwede magu pe twere, wegii twero ma gitye ki ngec muromo, gibimiyo nyo konyo joo magi me nongo cul mupore me dwoko ka wang jamigi nyo yoo mukene mupore me culo pi awano nyo bal mutimme.

Cik namba 30

Wegi twero ducu ma lok man makogi gibimiyo dok gibikonyo dul me wii-lobo ma gitiyo pi ilo rwom me kwo ki jwiko can pa dano ki lotic mukene ma rwatte ki tic man, me keto i tic twero mapat pat ma gimiyo botgi me nongo kare me konyo loring ayela oyot-oyot dok labongo lageng mo i dok i pacogi nyo konyogi me cito ka kwo i but lobo mukene ki ribogi me kwo ka'cel me kwo i kin dano odoco.